



vischnaunca da
sumvitg

Ordinaziun da sepultura e santeri

C u n t e g n

I.	Determinaziuns generalas	3
Art. 1	Dretg surordinau	3
Art. 2	Pleiv	3
Art. 3	Persuna da contact	3
Art. 4	Register da fossas	3
Art. 5	Cavar e cuvierer fossas	3
Art. 6	Formaziun dallas fossas	4
Art. 7	Manteniment dils santeris	4
Art. 8	Rumida dallas fossas suenter scadenza dil temps da ruaus	4
II.	Determinaziuns davart il santeri da Rabius	4
Art. 9	Crusch ni monument	4
Art. 10	Mesiras e distanzas dallas fossas	4
Art. 11	Urnas	5
III.	Determinaziuns davart il santeri da Sumvitg	5
Art. 12	Crusch	5
Art. 13	Mesiras e distanzas dallas fossas	5
Art. 14	Fossa communabla	6
Art. 15	Ornaments per la fossa communabla	6
Art. 16	Inscripziun dalla fossa communabla	6
Art. 17	Controlla dalla fossa communabla	6
Art. 18	Taxas per satrar en fossa communabla	6
IV.	Determinaziuns davart il santeri da Surrein	6
Art. 19	Crusch	6
Art. 20	Mesiras e distanzas dallas fossas	7
Art. 21	Mortuaris	7
Art. 22	Mortuari vegl	7
Art. 23	Mortuari niev	7
Art. 24	Ornaments	7
Art. 25	Taxas per ils mortuaris	8
V.	Determinaziuns finalas	8
Art. 26	Approbaziun e vigur	8

Sebasond silla lescha da sepultura e santeri (740.000) dalla vischnaunca da Sumvitg relai la suprastanza communal la suandonta ordinaziun.

I. Determinaziuns generalas

Art. 1 Dretg surordinau

Las prescripziuns dalla lescha da sepultura e santeri ston vegnir risguardadas.

Art. 2 Pleiv

¹ La pleiv Sumvitg ei responsabla per il manteniment ordinari dil santeri tenor art. 7 da questa ordinaziun.

² La pleiv Sumvitg sa relaschar atgnas disposiziuns executivas pertuccont il manteniment ordinari dils santeris. Determinaziuns digl uorden executiv dalla pleiv che cunterfan alla lescha communal e questa ordinaziun ein buca valeivlas.

³ La pleiv elegia ed indemnisescha il persunal per la lavur da manteniment ordinari dils santeris. Ella fixescha ils pensums dil persunal enteifer lur disposiziuns executivas.

Art. 3 Persuna da contact

Sco persuna da contact denter la pleiv e la vischnaunca funcziunescha il president dalla pleiv sco representant dalla pleiv ed il cau dil ressort santeri sco representant dalla suprastanza communal.

Art. 4 Register da fossas

¹ Il register da fossas vegn menaus dall'administraziun communal.

² Ils plans da santeri ston cuntener el minimum num, prenum, onn da naschientscha, onn da mort dil defunct e localisaziun dalla fossa.

Art. 5 Cavar e cuvierer fossas

¹ La lavur da cavar e cuvierer la fossa vegn exequida entras ils collaboraturs communal.

² Ils cuosts per quella lavur per defuncts cun davos domicil en vischnaunca da Sumvitg van per grevezia dalla vischnaunca. Ils cuosts per ils defuncts ch'ei buca domiciliai en la vischnaunca da Sumvitg cun lubientscha speciala da satrar tenor art. 8 dalla lescha da sepultura e santeri vegnan adossai directamein als vegnentsuenter dil defunct.

³ La taxa per cavar e cuvierer las fossas munta per:

- | | |
|----------------------|-------------|
| a) fossas da carschi | frs. 500.-- |
| b) fossas d'affons | frs. 400.-- |
| c) fossas da barets | frs. 200.-- |
| d) fossas d'urnas | frs. 150.-- |

Art. 6 Formaziun dallas fossas

La formaziun dallas fossas ei caussa dils vegnentsuenter e sto succeder en concordanza cun il cavafossa sil pli tard dus onns suenter sepultura. Las fossas ston haver ina crusch ni in monument. Las particularitads dils santeris ston vegnir risguardadas.

Art. 7 Manteniment dils santeris

¹ Sco manteniment ordinari tenor art. 11 al. 1 dalla lescha da sepultura e santeri valan lavurs che serepetan periodicamein (sco p.ex. tener uorden, segar pustgets, dismessa da neiv pil diever ordinari dil santeri sco era per sepulturas, dismessa da curdems, chisar vias, zerclar etc.) ed ein necessarias pil diever e pil maletg dil santeri. La pleiv vegn indemnisada persuenter cun ina pauschala annuala da frs. 6'000.--.

² Sco manteniment extraordinari tenor art. 11 al. 2 dalla lescha da sepultura e santeri valan principalmein la construcziun ed il manteniment da mirs, seivs entuorn il santeri, furniziun da material per ulivar las fossas e material per il manteniment ordinari, sco era la rumida da neiv en cass da grondas nevadas, cun consentiment dil cau da ressort santeri.

³ Manteniment extraordinari pigl onn proxim ei da comunicar alla suprastonza communal ni al cau da ressort santeri sil pli tard el settember digl onn current, sinaquei che l'executiva communal sappi risguardar quella expensa el rom dil preventiv.

Art. 8 Rumida dallas fossas suenter scadenza dil temps da ruaus

¹ Las fossas vegnan rumidas suenter sil pli tard 24 onns cun resalva da situaziuns extraordinarias tenor leschas surordinadas. La rumida ei caussa dils vegnentsuenter.

² La rumida dallas fossas cuntegn dismetter la rama, il monument ni la crusch, igl ulteriur uorden dalla fossa ed igl ulivar terren.

³ La vischnaunca exequescha quella lavur sin damonda tenor art. 20 dalla lescha da sepultura e santeri cun adossar ina taxa per la lavur da frs. 150.-- als vegnentsuenter.

⁴ Giavischan ils vegnetsuenter da salvar la crusch ni il monument, ston els procurar il transport naven dil santeri. Il transport entras la vischnaunca succeda mo sin damonda e cun adossar ils cuosts tenor tariffas da vischnaunca als vegnentsuenter.

II. Determinaziuns davart il santeri da Rabius

Art. 9 Crusch ni monument

Sin mintga fossa duei vegnir tschentau ina rama, in monument ni ina crusch fier cun l'inscripziun dil defunct.

Art. 10 Mesiras e distanzas dallas fossas

¹ Per mantener la formaziun dil santeri ston las suandontas mesiras tier las fossas vegnir risguardadas:

- | | |
|------------------------------|--------|
| a) lunghezia dallas fossas | 1.40 m |
| b) ladezia dallas fossas | 0.60 m |
| c) altezia cruschs/monuments | 1.30 m |
| d) ladezia cruschs/monuments | 0.60 m |

- e) distanza denter fossas 0.30 m
- f) ladezia dallas vias 0.95 m

² Per mantener la formaziun dil santeri ston las suandontas mesiras tier las fossas d'urnas vegnir risguardadas:

- a) lunghezia dallas fossas 0.80 m
- b) ladezia dallas fossas 0.60 m
- c) altezia cruschs/monuments 0.70 m
- d) ladezia cruschs/monuments 0.40 m
- e) distanza denter fossas 0.30 m
- f) ladezia dallas vias 0.80 m

Art. 11 Urnas

¹ Las urnas vegnan satradas davart dretga sisum il santeri.

² La taxa per satrar urnas en la fossa d'urnas preparada munta frs. 400.--.

III. Determinaziuns davart il santeri da Sumvitg

Art. 12 Crusch

Sin mintga fossa duei vegnir tschentau ina rama ed ina crusch fier cun l'inscripziun dil defunct.

Art. 13 Mesiras e distanzas dallas fossas

¹ Per mantener la formaziun dil santeri ston las suandontas mesiras tier las fossas vegnir risguardadas:

- a) lunghezia dallas fossas 1.30 m
- b) ladezia dallas fossas 0.50 m
- c) altezia cruschs/monuments 1.30 m
- d) ladezia cruschs/monuments 0.60 m
- e) distanza denter fossas 0.40 m
- f) ladezia dallas vias 1.00 m

² Per mantener la formaziun dil santeri ston las suandontas mesiras tier las fossas d'urnas vegnir risguardadas:

	santeri d'urnas seniester dall'entrada	santeri d'urnas a miez il santeri
a) lunghezia dallas fossas	0.60 m	0.70 m
b) ladezia dallas fossas	0.40 m	0.50 m
c) altezia cruschs/ monuments	0.85 m	0.90 m
d) ladezia cruschs/ monuments	0.40 m	0.50 m
e) distanza denter fossas	0.25 m	0.40 m
f) ladezia dallas vias	--	1.00 m

Art. 14 Fossa comunabla

¹ El santeri da Sumvitg stat ina fossa comunabla per sepulturas dall'entira vischnaunca a disposiziun. La fossa comunabla stat era a disposiziun per defuncts cun lubientscha speciala che han buca giu domicil en vischnaunca da Sumvitg il mument da lur mort.

² La damonda per far diever dalla fossa comunabla sto vegnir tschentada alla suprastanza communal.

Art. 15 Ornaments per la fossa comunabla

¹ Duront e suenter ils dis da sepultura astga vegnir deponiu fluras ed in simbol da cardientscha el liug destinau persunter sper la fossa comunabla. Sil pli tard suenter treis meins dueien tut las fluras ed auters ornaments da fossa vegnir allontanai entras ils vegnetsuenter.

² Ornaments da fossa e fluras ch'ei seccadas ni ch'ei vegnidas macortas, ei d'allontanar.

³ Ei dat negina pusseivladad da crear in simbol individual sin la fossa comunabla.

Art. 16 Inscriziun dalla fossa comunabla

¹ La tabla da regurdientscha cuntegn num, prenum, onn da naschientscha ed onn dalla mort dil defunct. La tabla vegn piazzada sin las plattas da crap sil pli tard treis meins suenter la sepultura.

² Il liug da quella inscripziun sto buca esser identics cul liug nua che l'urna ei satrada.

³ Per defuncts che vulan restar anonims en la fossa comunabla vegn desistiu d'ina inscripziun.

Art. 17 Controlla dalla fossa comunabla

La vischnaunca meina ina controlla ed in plan exact nua che tgei urna ei satrada. Quei plan vegn denton buca publicaus.

Art. 18 Taxas per satrar en fossa comunabla

¹ La taxa per satrar urnas en la fossa comunabla munta frs. 1'800.-- per defuncts cun davos domicil en vischnaunca e frs. 2'100.-- per defuncts cun davos domicil ordeifer la vischnaunca.

² En quella taxa ei cumpriu igl arver ed il cuvierer la fossa e l'inscripziun silla tabla da regurdientscha.

IV. Determinaziuns davart il santeri da Surrein

Art. 19 Crusch

Sin mintga fossa duei vegnir tschentau ina crusch fier cun l'inscripziun dil defunct.

Art. 20 Mesiras e distanzas dallas fossas

¹ Per mantener la formaziun dil santeri ston las suandontas mesiras tier las fossas vegnir risguardadas:

- | | |
|--------------------|--------|
| a) altezia cruschs | 1.30 m |
| b) ladezia cruschs | 0.60 m |

² Ulteriuras mesiras e distanzas che ston vegnir risguardadas vegnan indicadas dil cava-fossa.

Art. 21 Mortuaris

¹ El santeri da Surrein stattan per sepulturas dus mortuaris a disposiziun.

² Las nischas d'urnas vegnan serradas cun plattas da crap che la vischnaunca metta a disposiziun.

³ Vegnan las fossas allontanadas ni nischas d'urnas sligadas duei la tschendra ord las urnas vegnir satrada dignamein ella proxima fossa che vegn cavada si. La platta dalla nischa vegn surdada alla famiglia dil defunct.

Art. 22 Mortuari vegl

¹ Las plattas el mortuari vegl survegnan in'inscripziun cun num, prenum, onn da naschienscha ed onn dalla mort dil defunct.

² Sur l'inscripziun vegn fermu ina crusch ni in auter simbol che indichescha la religiun ni la confessiun. Mintga platta dil mortuari ha naven dall'entschatta ina crusch.

³ Sper l'inscripziun astga era vegnir fermu ina fotografia dil defunct. La rama per la fotografia metta la vischnaunca a disposiziun. L'emprema inscripziun ei da posizunar aschia ch'ei ha aunc plaz per ina secunda inscripziun.

⁴ La crusch (ni auter simbol), l'inscripziun e la fotografia ston esser unificadas. Las plattas vegnan montadas entras la vischnaunca suenter la sepultura. La fotografia e l'inscripziun san era vegnir montadas pli tard.

Art. 23 Mortuari niev

¹ Las plattas el mortuari niev survegnan in'inscripziun cun num, prenum, onn da naschienscha ed onn dalla mort dil defunct.

² Sur l'inscripziun vegn fermu ina crusch ni in auter simbol che indichescha la religiun ni la confessiun. Mintga platta dil mortuari ha naven dall'entschatta ina crusch.

³ Sper l'inscripziun astga buca vegnir fermu ina fotografia dil defunct. L'emprema inscripziun ei da posizunar aschia ch'ei ha aunc plaz per ina secunda inscripziun.

⁴ La crusch (ni auter simbol) e l'inscripziun ston esser unificadas. Las plattas vegnan montadas entras la vischnaunca suenter la sepultura.

Art. 24 Ornaments

¹ Mintga nischa el mortuari vegl dispona d'in sem e mintga nischa el mortuari niev dispona d'in plaz per ina candeila ni matget. Construcziuns stablas astgan buca vegnir fermadas vid la tabla ni la nischa.

² Tier la sepultura astgan fluras e tschupials vegnir deponi davon ils mortuaris (ev. indrez da pender si tschupials). La dismessa da fluras e tschupials ei en responsabladad dalla famiglia dil defunct.

³ A caschun dils dis dallas olmas, d'autras fiastas da baselgia ni per ornament astga vegnir mess mo ina candeila ed in matget sil sem ni sil plaz da nischa dils mortuaris. La grondezia sto es-ser aschia ch'ella cuviera buca l'inscripziun.

⁴ Giun plaun avon il mortuari vegl astga buca vegnir mess fluras auter che a caschun dalla sepultura.

Art. 25 Taxes per ils mortuaris

¹ La taxa per igl empram plaz ella nischa cun platta ed inscripziun munta per defuncts cun davos domicil en vischnaunca frs. 2'200.-- e per defuncts cun davos domicil ordeifer la vischnaunca frs. 2'500.--.

² La taxa per il secund plaz ella nischa cun inscripziun munta per defuncts cun davos domicil en vischnaunca frs. 1'000.-- e per defuncts cun davos domicil ordeifer la vischnaunca frs. 1'500.--.

³ La taxa per la rama dalla fotografia el motuari vegl munta per tuts defuncts frs. 80.--.

V. Determinaziuns finalas

Art. 26 Approbaziun e vigur

Questa ordinaziun ei vegnida approvada dalla suprastonza communal ella seduta dils 23-10-2017 e passa en vigur ensemen cun la lescha da sepultura e santeri ils 01-01-2018.

Il president communal

sig. Armin Candinas

Il canzlist communal

sig. Fabian Collenberg